

2020-mi aningaasaqarneq 0,4 pct.-imik qaffariarpoq


2020-mi Kalaallit Nunaata aningaasaqarnera 0,4 pct.-imik qaffariarpoq, tunisassiat ataatsimut nalinganik uuttorlugu (BNP). Qaffariarpoq ingerlatsiviit tunisassiornermik ingerlataqartut siuariarnerannik pissuteqarpoq, annermik *Aalisarneq*, *Tunisassiorneq* aammalu *Illuliornikkut sanaartormikkullu ingerlatsiviit*. Ingerlatsiviit *Aalisarneq Tunisassiornerlu* raajanik qaleralinnillu avammut tunisaqarnerat annertuseriarpoq naak kilomut akit apparaluartut taavalu nualluummik covid-19-imik nunarsuarmi nappaalasoqaraluartoq.

Covid-19 pissutaalluni pisortatigoortumik killilersuinerit 2020-mi ingerlatsiveqarfinnut *Assartuineq* taavalu *Akunnittarfiit neriniartarfiillu* annertunerpaamik kingunerluppoq. Tassa inuussutissarsiorfinni taakkunani naleqarnerulersitsineq 18,3 pct.-imik taavalu 45,5 pct.-imik apparput.

Nuna tamakkerlugu naatsorsuutini ingerlatsiveqarfiit tamaasa isigalugit naleqarnerulersitsinermi siuariarnerpaasut tassaapput *Illuliornikkut sanaartormikkullu ingerlatsiviit*. Ukiup siuliani akiusimasut aallaavigalugit naatsorsuinermi ingerlatsiveqarfiup naleqarnerulersitsinera 2.045 mio. kr.-inut qaffappoq, ukiup siuliani 1.901 mio. kr.-iusimalluni. Qaffariaat 143 mio. kr.-iuvoq imaluunniit 7,5 pct.

Titartagaq 1.

Tunisassiat ataatsimut nalingat (BNP), akit qaffakkiartornerat peerlugu



Takussutissiami 1-imi takuneqarsinnaavoq BNP akini ingerlaavartuni aammalu BNP akiusimasunit kisitat akit qaffakkiartornerat peereerlugu ineriartornerat. BNP akiusimasunit kisitat inummut ataatsimut naatsorsornerani 2020-mi 276,1 tkr.-inningsimavoq 2019-imi 275,5 tkr.-iusimasoq. Taamaalilluni 0,2 pct.-imik annertuseriarpoq.

Takussutissiaq 1. BNP aamma BNP innuttaasunut agguarlugu


	2011	2012	2013	2014	2015	2016	2017	2018	2019*	2020*
Akit ingerlaavartut										
BNP, mio. kr.	14.412	15.116	15.080	15.951	16.814	18.224	18.829	19.296	19.970	20.124
Innuttaasunut agguarlugu, 1.000 kr.	254,6	266,4	267,5	283,4	298,7	326,3	337,1	345,3	356,7	358,8
Naleqqersuut, 2010=100	102,4	107,4	107,1	113,3	119,4	129,4	133,7	137,1	141,9	142,9
Ukiumut BNP-ip ineriartornera	2,4	4,9	-0,2	5,8	5,4	8,4	3,3	2,5	3,5	0,8
2010-mi akit, akusimasunit kisitat										
BNP, mio. kr.	14.008	14.203	14.019	14.684	14.312	14.983	14.990	15.084	15.426	15.481
Innuttaasunut agguarlugu, 1.000 kr.	247,4	250,3	248,7	260,9	254,3	268,3	268,4	269,9	275,5	276,1
Naleqqersuut, 2010=100	99,5	100,9	99,6	104,3	101,7	106,4	106,5	107,1	109,6	110,0
Ukiumut BNP-ip ineriartornera	-0,5	1,4	-1,3	4,7	-2,5	4,7	0,1	0,6	2,3	0,4

Nuna tamakkerlugu naatsorsuutit FN-ip nunanut tamalaanut naatsorsueriaa-sissatut najoqqutassiai malillugit naatsorsugaapput, tamatumalu ajornarun-naarsippaa Kalaallit Nunaata aningaasaqarnerata nunanut allanut najoqqu-tassianik malinnittunut sanilliunneqarsinnaanera. Titartakkami ataaniittumi Kalaallit Nunaanni aningaasaqarnerup ineriartornera nunanut toqqakkanut arlalinnut, nunallu OECD-mut ilaasut agguaqatigiissillugu ukiumut ineriartor-nerannut sanilliunneqarpoq.

Titartakkami takuneqarsinnaavoq Kalaallit Nunaat aningaasaqarnikkut covid-19-ip kingunerluutaanik nunanut allanut sanilliulluni annikinnerusumik eq-qorneqarsimasoq. Tassa 2020-mi BNP annertuserialaarpoq nunat Skandinaviamiittut taavalu OECD-miittut BNP-at annikilleriarsimasoq. 2016-imiit 2020-mut ukiumiit ukiumut nikeriartarnerit agguaqatigiissillugit katik-kaanni aningaasaqarnikkut siuariarnerpaajusuni Kalaallit Nunaat Danmarkilu normu 2-tut inissisimapput.

Titartagaq 2.

Kalaallit Nunaanni nunanilu allani BNP-p ineriartornera 2016-2020



Covid-19 pillugu ikiorsiissutit

Nunarsuaq tamakkerlugu covid-19-imik tuniluuttoqarneranut atatillugu killi-lersuinerit aningaasatigut kingunipiluuteqarnissaat pakkersimaarniarlugu inuussutissarsiutinut ikiorsiissutinik qinnuteqarsinnaanermut pisortaniit peri-arfissiisoqarnikuuvoq. Ikiorsiissutit ukununga siunertaqarput:

akissarsititsinermut taartisiat, kaaviiartitanik annaasaqarnermi matusissutit, takornarialerisut akikilliliisinnaanerannut tapiissutit, aaqqissuuteriikkamik angallassisartut akikilliliinissaannut tapiissutit kiisalu aalisartut tunisaasa nalikillinissaannut taarsiissutit.

Nuna tamakkerlugu naatsorsuusiormi periutsit Eurostat-ip maleqqusai aallaavigalugit ikiorsiissutit qulaani pineqartut tunisassiornermi tapiissutit inisinneqarput. Taamaattumik toqqaannartumik tunisassiat ataatsimut nalingat (BNP) sunnerneqanngilaq, taamaallaat kalluarneqartut tassaapput tunisassiornerup pilersitaanik ataatsimut isertitat (BFI) taavalu tunisassiornermi sinneqartoorutit.

*Nuna tamakkerlugu
naatsorsuutit naatsumik*

Nuna tamakkerlugu naatsorsuutit tunisassiornermit aallaavillit inuiaqatigiit aningaasaqarnerata ineriartorneranik ersersitsisarput. Naatsorsukkat takutit-tarpaat inuutissarsiutit inoqutigillu aningaasaqarnerat, minnerunnngitsumillu avammut niueqateqarnerup ingerlanera. Taamaasilluni nioqqutit kiffartuusinerillu pilersiorneqartut atorineqartullu naatsorsuusiartigut takussutissartaqalersarput. Saqqummersitaq manna, Naatsorsueqqissaartarfiup saqqummersitaani nuna tamakkerlugu naatsorsuutini ukiunik arlalinnik tunngaveqartuni, aqqanilissarivaat.

Nuna tamakkerlugu naatsorsuutit 2018-imoortut naatsorsoqqissaarneqarsimalerput, taamaasillutillu inaarutaasumik saqqummiunneqarsinnaanngorlutik. Naatsorsueqqissaarinerit nutaat BNP allannguuteqartippaat. Nuna tamakkerlugu naatsorsuutit inaarutaasut naatsorsoqqissaarnerisa 2019-imut aamma 2020-mut BNP-mik missingersuusiortoqarsinnaalersippaat.

Naatsorsueqqissaartarfiup nittartagaanut www.stat.gl-imut saqqummersitaq ”2011-miit 2020-mut nuna tamakkerlugu naatsorsuutit” pdf fiilinngorlugu aaneqarsinnaavoq.

Saqqummersitami paasissutissat itisilerlugit kisitsisaataasivimmuut aaneqarsinnaapputaaq una aqqutigalugu www.stat.gl.

Paasissutissanik annertunerusunik paasisaqarusuttut uunga attaveqarsinnaapput; Naatsorsueqqissaartarfiup pisortaa Anders Blaabjerg, e-mail abla@stat.gl (oqarasuaat 36 23 72).

Inussiarnersumik inuulluaqqusillunga
Anders Blaabjerg